



FM 2015/123

Michael Rosing

27. maj 2015

**Allaffissornikkut ingerlatsiviup atugarisai aqqissugaaneralu pillugit apeqquteqaat aallaavigalugu oqallisissiamik siunnersuut. Ullumikkut pisortaqarfeqarnikkut aqqissugaanerput nukissanik atuiffiulluarlunilu inuiaqatigiit angissusaannut kulturiannullu naleqqussagaava.**

(Inatsisartunut ilaasortaq Naaja H. Nathanielsen, Inuit Ataqtigiit)

Demokraatini qujavugut Inatsisartuni ilaasortap Naaja Nathanielsenip oqallinneq una pissanganartoq aallartimmagu.

Ullumikkut pisortaqarfeqarnikkut aqqissugaanerput nukissanik atuiffiulluarlunilu inuiaqatigiit angissusaannut kulturiannullu naleqqussagaanersoq pillugu apeqqummut naatsumik akisinnaavugut; Naagga, taamaattoqangilaq. Apeqqutaalluni kisitsisit qanoq naatsorsorneqarnersut kalaallit 100-rujungaangata 25-t arlaatigut pisortanut attuumassuteqartumi suliffeqarput. Savalimmiuni inuit 12-t. Soorunami Savalimmiut nunaavoq allaanerusoq, ilinniarluarsimanerupput allamillu kultureqarlutik. Assigiissuteqarpugulli taamaattumik isumaqarpugut assersuussinermi atorluarsinnaallutigu.

Demokraatini qineqqusaarutitta ilagaat akileraartarnikkut tunguinikkullu iluarsaassinissaq, tassani ingerlatitseriaaserpassuit akerleriimmata. Assersuutissatsialaqarpoq ilungesorluni naapertuilluartumik ingerlatserusulluinnarneq innuttaasunut arlalitsigut kinguneqarnerlussinnaasarmat taamatullu piffissamik nukinnillu atuiffiusumik nakkutilliinertaqartarluni.

Uanga nammineq angorusutara tassaavoq kalaallinut ataatsimoortumik nalunaarsuiffeqalissasoq. Nammineq taavara kalaaliunermut allagartaq. Ukiamut taanna pillugu siunnersuuteqassaanga aamma aqqutissaavoq pisortat sulinerata ilaanut nutarterinissamut. Ullumikkut



ingerlatseriaatsimi inatsisini 50-ni attuumassuteqarnermut piumasaqaatit ilaapput, paasiniaarlugit piffissartornartut nukinnillu atuiffioqisut.

Demokraatini isumarput naapertorlugu sipaarfiusinnaasut pingajuat tassaavoq kommunini namminersorlutik oqartussanilu marloqiusamik allaffissornermi sipaarutaasinnaasut arlallit aamma kommunit ilaat eqqarsaatigalugit allaffissorneq pingasoqiusamik ingerlavoq KANUKOKA akunnermiliulluni akitsorsaataasutut ilaammat.

Demokraatit partiiuvoq liberaliusoq taamaattumik ilisarnaatitta ilagaat, pisortat - Namminersorlutik Oqartussat kommunillu - sapinngisamik innuttaasut inuunerannut annikinnerpaamik akulerusimassasut. Qamuuna iluunngarluta upperaarput, inuit ataasiakkaat nammineerluinnarlutik aalajangersinnaagaat suna imminnut pitsaanerpaanersoq. Ajoraluartumik pisortat ingerlatsinerat angingaarmat innuttaasut isumaqalersinneqarnikuupput suut tamaasa Namminersorlutik Oqartussat kommunillu akisussaaffigigaat. Isumaqalersitsinikuuvugut pisortat pisussaasut ataasiakkaarluta inuunerput pilluarnissarpullu isumagissagaat - taama isumaqarneq qimattariaqarparput. Pisortat taamallat isumagissavaat sanngiinersatta pisariaqartitsinertik naapertorlugu ikiorneqarnissaat aamma tatigineqassaaq uangut allat inuunitta qanoq ittuunissaa nammineq aalajangissagipput.

Taamatut oqaaseqarluta qujavugut oqallinnermut pissanganartumut.